



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :



Tir Yimyim



tir_yimyim



tir yimyim

TAPAK 7

Umar Khalid densema nisung teneti
mepishiba ken o SC-i angadangtsü

Police ket nung
automatic weapons mali

VOL. XXII ISSUE NO. 337 (ADOK 337) DIMAPUR KÜPTOKNÜ (SATURDAY) RONGJUI (SEPTEMBER) 20, 2025 ₹ 5.00

CANSSEA-i Sep 23 nü lungkak aittsü

Dimapur, September 19, 2025

(TYO): Confederation of All Nagaland State Services Employee's Association (CANSSEA)-i September 23, 2025 nü state ajungalen lungkak aitba sentong ka agitsü.

All India State Government

Employees Federation (AISGEF)-i tuyuba ama iba sentong agitsü aser CANSSEA Central-i CANSSEA office complex, Kohima nung aser CANSSEA District units-i pei pei District Head Quarters nung lungkak aittsü.

DAYO-i Niuland-Zadima lenmang anepalutsü rongshir

Dimapur, September 19, 2025

(TYO): Dimapur aser Kohima tsüingda sendaktepba otsüsütsü Niuland-Zadima lenmang yanglushitsü akhangba pusema nungiter ta Dimapur Ao Youth Organisation (DAYO)-i metetdaksüogo.

Kümtem süia arudang sorkari NH-29 nung dang temulung agütsür aser lialia iba lenmang ya nisung taküm samadak ka kümogo. Talisa tzüngluruwa mapang lung aluba aser anentsüh lendongtem ajanga senzusenbongertem timtemer aser mesenzüteter ta DAYO-i ashi.

NH-29 shibangdang Niuland-Zadima lenmang ajanga senzür saka iba lenmang asaa anepalu mesüi dang toktsür. Ministry of Road Transport and Highways-i October 7, 2016 nü Dimapur nungi Kohima (34.171 km) tashi Capital bypass road yanglutsü atema Rs 321.15 crore lezmüksü. Iba ya 2016-17 nung EPC basis nung ISC

scheme kübok lezmüksüba lir saka küm 10 jungnüa arudang iba lenmang nung terenlok aliba kecha majiteter. Iba ajanga sorkari paper nung dang mapa inyaker ta temulung malemba tuluba kümdaksür ta Media Cell, DAYO-i sangdong ka nung ashi.

Mapang shia lenmang noktangba, nisung yiruyibongba aser timtemba ya odangbo meyutsüsüla. Niuland-Zadima lenmang nung temulung magütsüba ya ketdangsübaren nung tashimaitba dang masü saka public nem temeten magütsüba aser ashioktsüba inyakyim ka lir ta parnokisa ashi.

Sorkari iba lenmang asaa dang senzuka yutsüra aser mapang telatet ka nung mapa meinyakra yimtsüngtem aser kasa tangatetba aliba lanur teloktemi temeten mangu tashi ozüngi melaba ama lungkak aittsüsa akümtsü ta DAYO-isa sorkar dang tekümdangtsü metetdaksüogo.

Advisor Yhome-i RMSA-2016 tesayurtem dang aremzüka atatsü mepishir

Kohima, September 19, 2025

(TYO): School Education and SCERT Advisor Kekhrielhoulie Yhome-i RMSA-2016 batch tesayurtem dang pei pei classroom-i oa mapa inyaksü aser aremzüka atatsü mepishia metetdaksüogo.

RMSA-2016 tesayurtemi akhangba scale pay aser service regularization onüktem ya okadak benoka lir ta Advisor Yhome-i ashi.

Kohima nung Directorate of School Education nung osangbener den jembidang Yhome-i "lungkak aitba tesayurtem indang khuretttem angateta lir saka parnoki mezüing scale pay atema okadaki ao" ta ashi.

Iba jagi State sorkari review petition ka benok aser iba obendang atar ta paisa ashi.

Iba senden nung Principal Director Shashank Singh aser Mission Director, Samagra Nagaland, L. Jamithung Lotha na aden.

"Asen sorkar school tem nung

tesayurtem malitsüsa tia ajuruba atema tanurtem atema süoki ia bilemstür. Tanurtem ya sensaktiba kibongtem nungi lir aser parnok shisaliok bushibaren nung tetsükdaksü ajurur" ta Yhome-isa ashi.

Okadaki mezüing tuyuba inyaksü atema sorkari nungnanga mali saka maparen shitak inyaksüla aser senotsü aotsüba jungjunga shisadangtsüla ta pai ashi.

Chief Minister lenisüba kübok tentetba ludeni tesayurtem maden yonga teinyaksü inyaka aotsü ta Advisor Yhome-isa ashi.

Tang lungkak aitba tesayur 367 ya centrally sponsored schemes kübok contractual basis nung dang shimok, iba nung termination clauses, no right to scale pay, aser bonds dena lir aser jelia parnok nem metetdaksür sign sütepa lir ta pai metetdaksü.

"Nagaland nung central schemes kübok tesayur 5,058 nungi RMSA-2016 batch nungi shilem kati dang okdaki ao.

(Maneni tapak 8 nung...)

Nagaland Survey nung income meputepba, mapa manguba & skills maliba bushitet



Kohima, September 19, 2025

(TYO): Nagaland Directorate of Economics & Statistics-i Hokolbarnü Employment, Unemployment, Skill and Migration indang 2025 Survey Report sayaogo.

Iba report nung income meputepba, technical skills maliba aser mapa manguba khuretttem shia lir.

Tanü Directorate office nung Information Technology & Communication, Economics & Statistics and Evaluation Advisor H. Sethrongkyu Sangtam-i iba report sayatsü. "Iba survey ajanga Nagaland nung Labour Force Participation Rate (LFPR) 56% nung aliba bushitetogo. Maneni employment rate

83.92% aser unemployment rate 16.0% lir" ta Department nung Director Neidilhou Keditsu-i ashi.

District jenjang nung highest employment rate (91.08%) rate ji Mon lir aser külen highest unemployment ji Phek nung 25% lir.

Labour Force Participation Rate (LFPR) rate teimtibaji Wokha nung 75% aser tajemtibaji Tuensang nung 41% lir.

Nagaland nung alir 92% dak technical education mali aser respondents rongnung 24% dang Employment Department nung tenüing zuluoka lir.

Maneni, kibongtemi ita shia senotsü endokba nung tetsüngda tulu lir aser Rs. 1,133 nungi Rs. 3.6 lakh tsüngda

endokba bushitetogo. District tem rongnung senotsü teimtiba endokbaji Dimapur nung Rs. 22,716 aser tajemtiba endokbaji Rs. 13,849 lir.

Pei talidak toktsür aoertem asadangba nung yimtsüng nungi jilatemi aoer 55% liasü aser parnok ya mapa, shishilembaba aser kiyimba atema pei talidak toktsür aoba liasü. Ajisüaka tesem melenshiaka aayanger teimba kati Rs. 20,000 teküpok ang aazüker.

Iba survey ya taküm February aser March tsüngda agiba liasü aser Nagaland nung human resource utilization jangjatsü nükjidong nung agi ta Director Keditsu-i ashi.

Iba survey nung kilen 4395 asadang aser iba nungi jilattem nung 1315 aser yimtsüngtem nung kilen 3080 dena liasü, ta paisa ashi. Nagaland nung average monthly household expenditure ji Rs 16,522 lir, aser minimum expenditure Rs. 1133 aser maximum expenditure Rs. 3,61,647 lir ta paisa metetdaksü. (Maneni tapak 8 nung...)

ART mozü agi HIV aketertem arishi langdaksür: Dr. Temsumenla Longkumer

Mokokchung, September 19, 2025

(TYO): Clark Theological College, Aolijen nung 19th Sept, 2025 nü "HIV and AIDS" onük dak sentakba nung tesayuba sentong ka agiogo.

Iba sentong ya National Aids Control Organization (NACO) den yaritepa CTC Red Ribbon Club-i ayongzüik. Sentong nung shisalen sayur Mokokchung Imkongliba Memorial District Hospital (IMDH) ART Centre nung Senior Medical Officer, Dr. Temsumenla Longkumer-i jembidang, tang tashibo HIV/AIDS tashitak aneptsü asoshi mozü adoka mali, saka iba tashitak ya Antiretroviral Therapy (ART) mozü shitak achiba ajanga nisung ka taküm tangar (normal nisung ka) ama arishi kasasa litettsü akoker, ta ashi.

"Ne dak HIV aket maketbaji tetendangba aginung dang metettsü, anungji, ratamata-a

malitsü asoshi nisung ajaki HIV tetendangba ya agitsüla, kechiaser iba tashitak ya menur putet nungbo majunger, anungji, memenudang aser meratatsü asoshi tashitakji tendangbajisa tajungba", ta lai ajungshia liasü.

ART ya taküm piyong achitsüba mozü lir. Iba mozü ya Nagaland nung district civil hospital ajak nung sarkari angati agütsür, tanur tain ajak achitsü atema mozü lir aser ibai achiba ajanga temang nung timtem agütsüba buluabo mangur, ta laisa shisem.

Nisung aikadi ART mozü tatsüka chirbo mechi-i akümer, kodang mozü junga mechidir temang tashi mait akümtsü aser shirang balala agi meneptsü aser HIV mesen jagi AIDS kümer tasüba agi meneper, anungji, anogoshi/mapang shitak nung mozüji achitsüla, ta laisa takümdangtsü ka lemsatet.

Laisa HIV aser AIDS na tebandang indang aser HIV agi AIDS akümba, HIV tashitak ya koma menateper, HIV aketbaji koma sür meteter - shirangba tamaittsütem, HIV tendangaka positive madokba (window period), iba tashitak nungi jenbua alitsü tasatem tatongi lemsatet. "HIV mesenji metepseteter saka ART mozü ajanga mesenji aziokteter aser mozü shitak chira tangar ama arishi talang liteter", ta laisa kuli balala bener arua metetdaksü.

Iba sentong temer külen CTC nung azünger kaketshir 14-i mulungsoa HIV tetendangba agi. Red Ribbon Club, CTC ketdangsür Alemyanger iba sentong nung menden liasü aser CTC Academic Dean, Rev. Dr. A. Tali Ao-ia shilem agia tepela o lemsatet. Mobile ICTC, Mokokchung nungia staff kar arua parnokia shilem agia liasü.

Manipur nung Assam Rifles sepai 2 khaset

Imphal, September 19, 2025

(Agencies): September 19, 2025 nü Bishnupur district kübok mejangjatetba nisungtemi Assam Rifles convoy ka amakdang sepai ana khaset aser aika yirutsü.

Iba lendong ya taonung 5:50 ako meta Nambol Sabal Leikai nung atalok. Assam Rifles sepaitem 407 Tata gari ka nung

Imphal nungi Bishnupur leni aodang amak.

Idangji AR sepai ana khaset aser aika yiruja lir. Iba lendong nung yirurtem ajak Regional Institute of Medical Sciences (RIMS), Imphal-i anir ogo.

Iba osang zülu tashi nung shirnoki AR sepaitem amak'ar mejangjatet lir aser search operation ka tenzükogo.

Manipur Governor-i iba tatalokba khukhua aitsüogo aser sepai tasür kibongtem den mangyimba metetdaksüogo. Paisa yirua alirtem tekaraba nung taneptsü angutsü atema sarasademtsüba lemsatetepogo.

Ibala inyakyim ya kodanga magizüksü aser item mapa inyakertem anema mapa tuluba inyaksü ta Governor-isa ashi.

Dimapur nung teintet rogotem kümshiba sentong agi



Dimapur District Ao Pensioners Telungjem lokti senden nung Lengrijan (Sümedem) mepu nung alir pensionertemi ken atenba noksa nung angur. (Dimapur , Sept. 19,2025).

Dimapur, Sept. 19 (TYO) : " Tanü 21st century putu yabo lanur putu masü saka tain putu lir, kechiyong tanü asen lima nung taküm alirtem rongnung lanurtem dang nungibo pensioner aser senior citizen teimba akümer aser yimten aser lokti mapa ajak nung taintemi dang khuret abenba angur," ta Tir Yimyim yimozülur K.Temjen Jamiri metetdaksü.

Pai iba o ya tanü yangi Dimapur nung DABA Town Fellowship tenla kidang Dimapur District Ao Pensioners' Telungjem lokti senden sentong nung " Shi aser tanela nung teintet rogo kümshiba " onük nung jembidang metetdaksü.

Pai tain putu küma aoba indang kuli kar agütsü dang , ' tanü asüng kibong kümaka

tanur malir aser masor teimba aser aliyonga control asür, anungji nisung anati ka meyangluteter aser aika kibong nung nisung ana agi tanur ka dang yanglur. Aji oda, külen tanur kanga ajema asor aser ano külen nisung arishi talangba talangba akümer, iba jagi taintem nübo züiner aser lanurtem nübo ajemer, " ta paisa shisem.

(Maneni tapak 8 nung...)

Kijumetoumayimtsüng nung MCH outreach camp agiogo

Dimapur, Rongjui/ September 19 (TYO): Chief Medical Officer, Kohima office aser District Health Society, Department of Health & Family Welfare, NHM na senteper Jakhama block kübok Kijumetouma yimtsüng nung September 17 nü Maternal & Child Health Outreach Camp ka ayongzüka agiogo.

Camp tenzüka sentong Kevinguu CHO, Kijumetouma HWC-SC lenisüba nung agi aser VCC/JAS Chairman

Kruzelie Paünuo-i tepela o jembia liasü.

Dy.CMO Dr. Imchatoshi-i, sentepa aliba lokti dang camp mapang agütsüba service tem agitsü ajungshi, koba tetsü aser tanur health aser libaliro tajung benshia anema alitsüba dak rangloker lir ta ashi.

Dy.CMO-isa, sentepa aliba lokti dang lokti health jenjang ajungketsü aser nisungshiai teyari agütsütsü asoshi health awareness dak sendakba nung

nisung ajak indang khuret lephsia metetdaksü.

DPO (RMNCAH+N) Dr. Khrievilhou Nakhro-i ashiba agi, camp ya tanur aser mashisa aliba tetsürtem dak tali rangloker agir. Paisa, child health atema Pediatrician, maternal health atema Gynaecologist, school-i aoba/ toktsür aliba tanurtem atema RBSK team, general ailments services atema MMU team indang metetdaksü.

(Maneni tapak 8 nung...)

Miss Kohima 2025 tetoktepba tenzüko



Kohima, Rongjui/Sept. 19 (TYO): Miss Kohima 2025 shimba sentong Hokulbarnü tenzüka Nagaland Institute of Science and Technology, Lerie nung Orientation & Sashing Ceremony agia liasü.

Iba sentong nung organizers, partners aser Miss Kohima 2025 asoshi tokteper parnok 16 tashi aden. Show Director and Co-Founder Theja Sekhose-i iba sentong nung jembidang taküm iba tetoktepba omen "Beauty. Health. Beyond." shia liasü.

"Chichiba tebour ajung ya temang anema aliba nung tera

yangloka alidang teperangba lir. Asangsang nung tejakleni aoba ajunga nüburtem ajungketer aser temang anema aliba aser meranga inyakba külemi jajatsü asoshi tarutsü jenjang yanglutsür. Iba korang ya nisungi metetba kisüng masü saka nübur tenzüksü asoshi teinyaktsü ka lir," ta pai ashi.

Taküm Miss Kohima ya Putuonuo Hospital den lungjemer maparen balala inyaktsü. Iba tesendaktep ajanga tetokteper tem October 4 nü anogo tepiyong session ka alitsü, kong health advocacy

indang angazüksü aser parnok ola amshia nüburtem ajungmesotsü, shisatsü agütsütsü aser anir inyaktsü indang yimya balala angatetdaksütsü.

Taküm Miss Kohima 2025 sentong September 20 nü Official Photoshoot (profile photos, videos, Miss Multimedia content) alitsü, September 22-27 nung Sponsor Activity (creative social media promotions) alitsü aser October 4 nü Health Advocacy with Putuonuo Hospital alitsü.

(Maneni tapak 8 nung...)

Kohima nung Polling Stations draft list renema lir

Dimapur, Rongjui/Sept. 19 (TYO):

Deputy Commissioner, Kohima, B Henok Buchem, NCS ajanga sangdong ka nung Kohima district kübok Polling Stations bentettsü asoshi Annexure I nung Polling Stations indang Draft List ya renema lir aser Notice Board nunga inokja lir

aser Election Branch, Office of the Deputy Commissioner & District Election officer Kohima nunga angutsü, ta ashi.

Temelenshitsü lira, tezüluba nung Office of Deputy Commissioner Kohima nem September 24, 2025 tashinung agütsütsüla, ta metetdaksü.

Longjang nung KVK Mokochung ajanga training agütsü

Dimapur, Rongjui/Sept. 19 (TYO): KVK Mokochung ajanga 'Soil management practices and Integrated Pest Management with special reference to Mokochung district' onük nung ajemdaker September 19, 2025 nü Kubolong block kübok Longjang yimdak training ka agüja liasü.

Aluyimer nem ali temu indang angatetdaksütsü aser aluyimba yimya tajungba aluyimer nem amshidakja ano

organic aser biological yimta amshia mesen tepsettsüba indang angazükdaksütsü nükjidong nung iba training ya agütsü.

Mozü mamshi mesen azüoktsüba yimyatam aluyimer nem angazükdaksü aser iba sülen biofertilizers aser sticky traps tem lema agüja liasü.

Iba sentong nung shisalen sayur ya Imtilemla ACTO (Soil Conservation) aser Dr. Martha Chakruno ACTO (Entomology) liasü, kong aluyimer 53 aden.

Dimapur nung Child Rights & Child Protection sentong ayongzü



Dimapur, Rongjui/Sept. 19 (TYO): Nagaland State Commission for Protection of Child Rights ajanga District Child Protection Unit Dimapur den lungjemer Child Rights & Child Protection indang awareness sentong ka Hotel Saramati, Dimapur nung Hokulbarnü ayongzüka liasü.

Iba sentong nung Deputy Commissioner, Dimapur, Dr. Tinojongshi Chang, NCS ajanga tanurtem dak tim masüba mapa inyakba tali akumba indang lemsatep aser sorkar departments, lokti tentet balala aser nüburtem dang lungjemer tanurtem asoshi parnok aliba temeket wazüka yutsütsü ayongzüka liasü.

District Child Protection Officer, Avika Zhimomi ajanga

stakeholders aser nübur ajunga lungjemer tanur kumzüka ayutsü atema mera agitsü nungdakba lemsatep.

Pai sentong nung adener ajunga dang lendong timtem mela-mela ajurutsü aliba tanurtem yaritsü ajungshia liasü.

Shisalen sayurtemi tanurtem dak sendakba tzüzüng-ozüng aser protection mechanisms balala indang rateta ashi.

Iba sentong nung Chairperson, CWC Dimapur, Moamenla Yaden menden liasü, Secretary, Social Welfare and Secretary, NSCPCR, Yongchingkumla, NCS ajanga pela agizükba o jembia aser Chairman, NSCPCR, Alun Hangsling ajanga iba sentong ayongzüka nükjidong lemsatepa liasü.

NSCW shisadokden senden ka Kohima nung amen

Dimapur, Rongjui/Sept. 19 (TYO): Nagaland State Commission for Women (NSCW) ajanga Nagaland nung aliba Apex Women Tribal Hohos tem den shisadokden senden ka September 17, 2025 nü SIRD Conference Hall, Kohima nung ayongzüka liasü.

Iba senden nung tetsür lokti tentet timba nungi tir aser tongti zülurtem dena Nagaland nung tetsür temeden, tashi aser kumzüka ayutsü dak sendakba ken o balala jembia liasü.

Mezüngbuba session nung Chairperson, NSCW, W. Nginyeih Konyak ajanga iba senden ayongzüka nükjidong rateta ashidang tetsürtem tetsübo makai alitsü asoshi arok lungjemer inyaktsü

nungdakba shia liasü.

Member, NSCW, Akokla Longchar-i Commission teinyaktsü aser inyakyim indang rateta ashi aser Member, NSCW, Kekhrienuo Meyase-i "The Key to Holistic Empowerment of Women" onük nung jembia liasü.

Commission indang Legal Consultant, Apila Sangtam-i Legal Rights of Women indang jembia liasü.

Iba senden nung NSCW indang member-secretary, Bodeno S. Colo menden liasü.

Nagaland tesem ajunga nung aliba tetsürtem takum nung kongshitsüsa sentong yanglutsü asoshi tetsür tribal hoho tem ola kanga tongtipang lir, ta Chairperson, NSCW, W. Nginyeih Konyak-i ashi.



September 19, 2025 nü New Delhi nung Jawaharlal Nehru University Students' Union (JNUSU)-i Citizenship Amendment Act (CAA), National Register of Citizens (NRC) aser National Population Register (NPR) anema longkak aitdang tangokba noksa nung angur.

Rahul Gandhi-i linük nung civil war adokdaksütsü ajungshir: BJP

New Delhi, Rongjui 19 (Agencies): Brihostibarnü Congress lenir Rahul Gandhi-i social media ajanga Gen Z dak sendakba olen ka metetdaksüba sülen BJP lenirtemi, Rahul Gandhi-i Nepal aser Bangladesh nung atalokba ama linük nung civil war adokdaksütsü ajungshir, ta aitsü.

September 18 nü osangbenertem senden ka nung Rahul Gandhi-i, Karnataka kübok Aland constituency nung voters tenüng aika agienba metetdaksüba sülen pai X ajanga, "Linük nung lanurtem, linük nung kaketshirtem, linük nung Gen Z lanurtemi linük temzüng kümzüksü, democracy kümzüksü aser vote auyaba nokdangsü. Mapang ajak nung ni parnok pusemer. Jai hind!" ta metetdakja liasü.

Ibaji aija BJP MP, Nishikant Dubey-i social media ajanga, "Gen Z-i kibong politics anemer. Anungji kechiba parnoki Rahul, Nehru, Indira, Rajiv aser Sonia nunger agizüktettsü?... Parnoki

(lanurtemi) ochimashi anema nokdaker. Parnoki Bangladesh nung Islamic linük aser Nepal nung Hindu linük amenokner, kechiba parnoki India ya Hindu linük ka mekümdaksür? India toktsür aotsü renema liang," ta ashi.

Dubey-isa, Rahul Gandhi-i Nepal aser Bangladesh nung atalokba ama atalokdaksüner, saka Gen Z lanurtemi linük nung temelenshi adokdaksüogo, ta ashi.

Paisa, "Gen Z tetezü tarutsü generation, lanurtem lir aser parnoki linük atema telemtetba agia sorkar melenshidaksüner. Gen Z-i India nung ibaji inyakadokogo," ta ashi.

Kullu, Himachal Pradesh nung osangbenertem den jembidang BJP MP, Kangana Ranaut-ia Rahul Gandhi-i jembiba o aija, teti agia pai linük maaksüdaksütsü o jembir, ta ashi.

Ranaut-i, "Pai longkak aittsü atema Gen Z lanurtem ayongzüker, aser Nepal nung

atalokba ama yangi atalokdaksüner, ajisüaka Nepal nung atalokba yabo Gen Z-i kibong sorkar atsüngdokba lir," ta metetdaksü.

Maharashtra Chief Minister, Devendra Fadnavis-ia, Rahul Gandhi-i 'Urban Maoist' o jembir, aser democratic inyakim ajanga tentetba sorkar ka anema apusotsü atema pai Gen Z lanurtem ajungshir, ta aitsü.

BJP lenir Syed Shahnawaz Hussain-i, "Rahul Gandhi-i iba linük nung lanurtem, kaketshirtem aser Gen Z lanurtem ajungshir. Pai linük anema lanurtem ajungmesor. Iba ya khenyongi magizüktettsü. Iba linük nung lanurtemi Ato kilonser Modi nükshir. Iba sorkar yagi lanurtem aser sensakertem atema inyaker, ta parnoki meteta lir," ta ashi.

Union Minister Pralhad Joshi-ia, nüburtemi par sorkar meshimba ajanga Gandhi-i sorkar akümtsü atema tanga lenmang bushir, ta aitsü.

Karnataka nung caste survey inyakim minister temi ashishir

Bengaluru, Rongjui/September 19 (Agencies): September 22 nungi tenzüka October 7 tashi Karnataka nung caste survey agitsü lia minister tem-a densema telok kari caste list ashishi tenzükogo, anungji survey agitsü atema ano anogo atsülangtsüa akok, ta osang ka ajanga metetdaksü.

Karnataka Deputy Chief Minister DK Shivakumar-i, Chief Minister Siddaramaiah den iba atemaji o lemtepba sülen telemtetba agitsü, ta metetdaksü.

Brihostibarnü cabinet senden

ka nung minister tem-a aikati survey agitsü atema renema aliba inyakim ashishia liasü, talisa caste list nung Khristan aser Hindu caste nüngja aika aliba parnoki ashishir. Caste list nungji Khristantem category aika lemsaa Kuruba Christian, Lingayat Christian, Vokkaliga Christian aser Ediga Christian ta lir.

Senden nungji caste list ashishiba sülen Siddaramaiah-i minister kar dang temeja senden ka amenba sülen senden nung lemtetbaji pa nem metetdakjang, ta tuyua liasü.

Deputy Chief Minister Shivakumar-i, "Onoki telemsa madokdaksüner. Congress party mesüra Congress sorkari telemsa madokdaksüner. Ajaki pei tebilemba lemsateptsü temeden lir, telok aikati parnok caste ji temeja züngoktsü mepishia liasü, ibayongji list nung züngokogo. Tesüiba mapangtem nunga yamai atalokogo. Ozü minister karia ashishia liasü, anungji onoki nüburtem dang tebilemba asüngdang. Onoki Chief Minister den jembiba sülen telemtetba agitsü," ta metetdaksü.



September 19, 2025 nü Bhubaneswar nung Odisha assembly nung BJD MLA temi longkak aitba noksa nung angur. Kasa noksa nung S p e a k e r Surama Padhya-angur.

Indian Consulate kümzüksü atemaCanada sorkari inyaksüla: MEA

New Delhi, September 19 (Agencies): US nung amenoka aliba Khalistani telok kati Canada nung Indian Consulate amokmerenba sülen Hokolbarnü ministry of external affairs (MEA)-i, Indian consulate nem security agütsütsüji Canada sorkar teinyaksü mapa lir, ta ashi.

Osangbenertem den jembidang MEA otongdar, Randhir Jaiswal-i, "Security agütsütsüji Canada sorkar teinyaksü mapa lir. Kodang tebilemtsü onük ajurudir onoki item sorkartem denji jembia inyaker. Canada NSA-i India NSA den jembio. Linük ana tsüngda mapang shia security atema jembir," ta metetdaksü.

India aser Canada na tsüngda tesendaktep yanglushiba sülen anogo ishika tejalkan Khalistani teloki Vancouver, Canada nung Indian Consulate amokmerena liasü.

Khalistani teloki, parnoki Indian Consulate agiadoktsü, ta shia India-Canada nungertem dang Consulate nungi aienshiang, ta metetdakja liasü.

Khalistani telokisa Indian high commissioner tasenba, Dinish Patnaik indang poster ka saya aser noksa nungji pa tejak nung 'target' sayua lir.

2023 küm September 18 nü Canada nung taoba Ato kilonser, Justin Trudeau-i Canadian Parliament nung, NIA-i kiralongrar, ta sangdonga aliba Hardeep Singh Nijjar kasetba nung India nunger agent temi shilem agia aliba bushisüngdangdar, ta metetdakja liasü.

Khalistan teloki, "Parliament nung iba osang metetdaksüba sülen küm ama jungogo, ajisüaka tang tashi Indian Consulates-i itdangitba mapa inyaker aser Khalistan Referendum campaign nung shilem agirtem mita repranger," ta metetdaksü.

2023 küm June 18 nü gurudwara kima nisung kari Nijjar khaseta liasü.

Iba sülen taoba mapang Canada Ato kilonser Trudeau-i iba tatalokba nung India-i shilem agia lir, ta tai tonglokja liasü.

Umar Khalid densema nisung teneti mepishiba ken o SC-i angadangtsü

New Delhi, September 18 (Agencies): 2020 küm northeast Delhi nung rara adokba ken o dak sendakba nung Hokolbarnü Supreme Court-i Sharjeel Imam aser Umar Khalid na densema nisung teneti bail mepishiba ken o angadangtsü.

Delhi High Court-i bail magütsüba aema parnoki mepishiba ken oji September 22 nü angadangtsü Supreme Court-i lemtetogo.

Hokolbarnü ken o angadangba mapang nung tai tonglokja alir ka atema ken o jembitsür lawyer kati bail temepishiba ken o angadangtsü atema anogo atsülangang, ta mepishiba nung ajemdaker Justice Aravind Kumar aser Justice N V Anjaria nati akümba bench-i Hombar nüang (September 22) iba ken oji angadangtsü lemtet.

Ano tanga osang ka nung, 2020 küm February ita nung northeast Delhi nung rara tulu

adoka kiojen jenti rongdoksüba aser nisung aika asüba ken o dak sendakba nung Delhi nung aliba court kati nisung trok-Hariom Gupta, Basant Kumar Mishra, Gorakh Nath, Rohit Gautam, Kapil Pandey aser Bheem Sain nunger aitsüogo.

Additional sessions Judge Praveen Singh-i, February 25, 2020 aonung 11:00 ako nungi 11:30 ako tsüngda tai tonglokja alirtem densema nisung 100-150-i dokan ka kakpoker bensatsüba sülen mi senokja liasü, ta metetdaksü.

Court-isa, lokti ket nungji ajok den tanga hadir liasü, ta ashi. Ken o benoker dokan kiburi pa sen lakh 1.5 shi takoksa anguba metetdakja liasü.

Ken o angadangba mapang nung court-i, ozüng alema lokti adenshibaji mapa tamajung inyaksü aser kiojen rongdoksütsü nükjidong nung liasü, aser iba ya IPC nung Arrla 435 kübok aibelenba lir, ta metetdaksü.

2020 küm Northeast Delhi nung rarabaken o nung nisung 6 aitsüogo

New Delhi, September 19 (Agencies): 2020 küm February ita nung northeast Delhi nung rara tulu adoka kiojen jenti rongdoksüba aser nisung aika asüba ken o dak sendakba nung Delhi nung aliba court kati nisung trok- Hariom Gupta, Basant Kumar Mishra, Gorakh Nath, Rohit Gautam, Kapil Pandey aser Bheem Sain nunger aitsüogo.

Additional sessions Judge Praveen Singh-i, February 25, 2020 aonung 11:00 ako nungi 11:30 ako tsüngda tai tonglokja alirtem densema nisung 100-150-i dokan ka kakpoker

bensatsüba sülen mi senokja liasü, ta metetdaksü.

Court-isa, lokti ket nungji ajok den tanga hadir liasü, ta ashi. Ken o benoker dokan kiburi pa sen lakh 1.5 shi takoksa anguba metetdakja liasü.

Ken o angadangba mapang nung court-i, ozüng alema lokti adenshibaji mapa tamajung inyaksü aser kiojen rongdoksütsü nükjidong nung liasü, aser iba ya IPC nung Arrla 435 kübok aibelenba lir, ta metetdaksü.

Iba ken o nung aibelenertem nem temerenshi obendangji September 19 nü agütsütsü.



TIR YIMYIM YIMOBILEM (EDITORIAL)

DIMAPUR

KÜPTOKNÜ

RONGJUI 20, 2025

Teintet rogotem putu

Asenoki aiben bangpetsa tanü ya lanur putu ta jembir aser taintemi lanurtem danga "nenok lanur putu" ta ashiba angashir, anungji lanurtemia tanü ya lanur putua ta bilemer, ajisüaka alima yimten, lokti aser arogo nung asangsang nung atalokba mapatem reprangdangra, tanü putu ya lanur putu masü tain, teintet rogotem putu lir ta reprangteter. Ibaji taintem dak tajangshiba shisatsü aser rongsen tashi aliba agi dangbo masü saka alima nung ya Muslim nunger nütsüng züinba mezüangi tanga yimsü Khristan aser Hindu yimsü amanger kintem rongnung nütsüng nübo arenba sükdangra, tanur asoba kanga ajema sükdangtetsü aser yamaji nisunger arishi langa akümba agi tasüba-a kanga ajemogo, anungji külen tanur ajema asor aser külen nisungtem kangabo masür ta atalokba agi lanurtem dang nungibo teintet rogotem nütsüng teimba akümtsü aser asen lima nunga yamaji kümdagi. Aji oda, 19 century nungbo nisung arishi ya küm 40 nungi 50 tsüngda dang liasü aser iba sülen 20th century nung nisung arishi 60 nungi 70 tashi küma adok aser tang asenok 21st century nung alirtem arishibo 80 nungi 90 tashibo tashi itita alir. Aji oda, küm 74 sülen taruba 22nd century ajungdangbo nisunger arishi ya küm 100 nungi 150 tashibo litettsü aser oda-odabo nisunger arishi ya akhi putu ama noklang asem pezü tashia alitsü ta nisunger arishi indang shisadangertemi ashir. Idangjibo, alima nung nütsüng aika kümadoktsü, anungji zünga rüzük karbo tanga planet nung oa ali tenzüksü ta tarutsü nung nisunger arishi aser libaliru indang shisadanga bushirtemi bilemer. Atangji, item atalokbatemji asenokibo mangutsü saka ataloktsü amai asenokia bilemer. Iba ama putu ka nung teintet rogotem tasütsü anogo atar ama masü saka ano lanu kümshir pei jangraba aser Kibubai mulungba mapa apiteta, temang arakzüa mazüangi inyaka alitsübaji kanga tongtibang kümogo. Asenok aikati küm 60 nung government mapa nungi anenba agi ,joko, tantsür tambur kümer kecha meinyaktettsü amai bilemer, saka tanü putu nungbo küm 60 nungiang shitakba pei tebilemba tongteta inyaker. Iba jagiang, US nunga arishi küm 82 tain Joe Biden o arishi küm 78 tain Donald Trump na US tir menden asoshi election nung kümükümüküma toktepa asenoki nguogo. Aji oda, India nunga ato kilonser Narendra Modi yashiang küm 75 jungogo aser Nagaland nunga Chief minister Neiphiu Rio-a küm 75 jungogo. Kasaji, Nagaland nung election nung adokertemji teimbaka teintet rogotem asütsü. Iba amaji yimten nunga teintet rogotemiang raktepa shilem agidang, asenok teintet rogotemi asen lima nung temelenshi tajung bener arutsü asoshi lanurtem dak dang imlara, ibaji asenoki matatettsü. Kasaji, lokti nung teintet rogotemji küm nung dang masü mapa ajak nung teintet aser tajangshirtem lir, anungji Tsüngrem mapa inyaksü asoshia arogo dak dang meimlai teintet rogotem lungjemer inyaksüla. Kasaji, tebilemtsü aketba lanur takümttem melenshitsütsü asoshia arogo aser yimten dak meimlai teintet rogo telungjemi inyaktettsü. Teintet rogotem yabo arogo aser yimten nüngsen jembitsüba pur masü saka arogo aser yimteni merajemba aser matongbatem rajema inyaksüba purtem lir. Aji oda, tajung kaji tain kümer pei kisüng ajungtsü atema inyaksüba masü saka teintet rogotemibo tangar ajungtsü asoshi inyaksütsü, kechiyong tangar asoshi tajung inyakba nungiang tepela aser tesünep angur, aser tepela o tesünep naji tanur tain ajak asenok shi aser tanela kümükümshitsüba mozü tajungtiba ana lir ta teintet rogotemi angateta lir. Idangji, meteta aser memetetika alima melenshir alitsü, aser idangjiang lanur putubo arutsü.

OLEMSABANG

Asen lima tarutsü nükla aser teinyaktsü

Lanuchuba, Signal Angami, Dimapur

(Yashi adok nungi...)

24. Yamala mesük tashi mait aser teinyaktsü asenok dak ajitetba ajongshitep lemsar. Anungji asen Teyanglur Tsüngrem mezüngsüdaktsüti, süra election yimya-ya melenshitsü aser ochi nung nokdaker alitsu.
25. Asenok ajak tanela aser shi nung tashi mait kaji asenoki timba Kati Tsüngrem Tenla kidangi aotsu mejangra ano Temeshi Lai zunga sarasademtsü ajisa asenok asoshi mapa tasak, saka asenoki kodang Temeshi Lai tekong dangi meyipter yamai shia lir.(Tenüngsang Ken 128-1 aser 2. Nisung shia shibai Kibuba tsüngken tsübur, shibai pa lenmang nung jajar,pa tepelatsü. Kechiyong ne ket agi züsentetba nai achitsü. Na tepelatsü alitsü, aser ne den junga alitsü.)
26. Yangi kodang tangar yimsü tamangba reprangdangtir, parnokbo kanga tashi tait aser lumüa kanga akanga amanga inyaker aji asenok ajaki ngua dang lir aser angashir. Süra asenoki amangba taküm Tsüngrembo taküm aser Tanela. Anungji ya angatettsü tanü putu nung aginer.
27. Tanü asen nüburtem alimai ya aginer, tai toktepti,longjemshiti,putepshiti aser ajemalua awashi metetta meranga inyakti. Aji sera asen lima tarutsü tajung nükla angur.
28. Kechiba Laishiba aser Temeshi Lai tekong bener arutsüsa ashir süra tejangshiribo metettsü, saka mejangshir atemabo temetettsü kaji, kodang asenoki asen Tsüngrem, tamasüdaktsüter yangji asen kija aser kibong temelenshi, takok temoatsü, konang tetushi ajak lirko. Arungma inyakti aser inyak dangti.
28. Tashitemetet temoatsü aji Kong nungi arursüra yangi maneni Temeshi Lai tekong nung yaritepa.(Apijemtsu 3-1 nungi 6. Kü chir, kü tesayuba tama. Saka ne mulungjangi kü ozüngtem yuang. Kechiyong anogo alangba, aser taküm arishi tajung talubosa, aser tesünep, parnoki ne nem agütsütsü. Akhümtsübuba aser tamang katetbai na tetoktsüma. Itemji ne tekong nung alenlokang, itemji ne mulung lungpak manung züluokang. Sürabang nai Tsüngrem aser nisung tsüngdang, tesaklokba aser tenüng tajung tangatetba angutsü. Ne mulung ajak agi Kibuba dak amangang, aser na pei teshisadangba nung temulung lema teli. Ne lenmang ajak nung pa agizükang, aser Pai ne lenmangtem metongtsütsü.).
29. Arungma yamai dang melili, joko tanga mapa palala aser election inyakyim tamajung nungi pelar asen nüburtem tajung inyakba nung nükla yudi. Maneni yarisema Temeshi Lai tekong (Isaia 1-16 aser 18 nungi 19. Nenok shitokang, nenok merüka liang, kü nükdang nungi nenok temenen inyakba anenang.
Tang arung, aser asenoki külemi shisadangdi, ta Kibubai ashir, nenok temenen jakjaa meremaka, itemji rürjeb ama mesüngtsü, azü ama meremaka, itemji kümpa temesüng ama akümtsü. Nenoki hai-haura kaa aser tashi angara nenoki linük nungi tajung achitsü).
30. Tanü asen lima asoshi Tsüngrem akhümtsübutsüla aser meim nung dang alimaya melenshitsü, anungji tain tulu tila nati arung asenoki Temeshi Lai kakat azüngtsü jangrati aser züngdi süra memetetti Tsüngrem nungi shisatsü aser taküm asoshi Pai na aser ner kibong anitsü, arung inyakdangti.
31. ABJ Abdul kalam (former India President and scientist) indang kodang asenoki reprangdangter pai anogo shia inyakba künü nung yamai mapang telemsa inyakba alima otsü.
(A) Ghonda 8 mejangtsü (sleep)
(B) Mapa inyakba(working hours) ghonda 9 inyaksü.
(C) Kibong(family) atema ghonda 2.
(D) Tsüngrem(God) atema ghonda 1.
(E) Temang shilem inyakyim(Exercise) atema ghonda 3.
(F) Pei atema(self care) ghonda 1.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Arogoi mental health agi shirangertem yaritsüla: Dr. Santosh Mathew



September 17, 2025 nü Nagpur nung All India Congress on Church in Mission (AICOCIM) tasemnübuba sentong nung Dr. Santhosh T. Mathew-i jembidang tangokba noksa nung angur.

Nagpur (Maharashtra), Rongjui/September 19, 2025 (Agencies): September 17, 2025 nü Nagpur nung All India Congress on Church in Mission (AICOCIM) senden tasemnübuba anogo nung Dr. Santhosh T. Mathew-i India nung Arogotem dang tanü putu nung mental health atema lenla ajaklen nungi taneptsü agütsütsü atema inyaksüla; pastoral teyari agütsütsü kanga tongtiban, ta ashi.

Dr. Santhosh T. Mathew ya tamalen Emmanuel Hospital Association nung internal medicine specialist inyaka liasü. Healthcare tsütsü Arogo puti otsü dak sendakba nung Dr. Mathew-i, Arogoi shimang nung shirangertem dang masü saka tetsübu, timtem aser tejashi nung alirtema anepalua yaritsüla, ta ashi. Paisa akhidang nüngtugu doctor Galen-i wara mapang nung jena ao, saka Khristantembo jena moui pei taküm bendanga agüja shirangertem anepaluba metetdaksü.

"Item Khristantemji reshikangshi ajangshirtem liasü. Ajisüaka parnoki pei kiyongertem yaritsü atema khuret aben," ta pai ashi. Paisa akhidang Khristantemi ainlen jajartem jenoka anisüngzükdaksüba aser putu tasenba nung missionary temi hospital aika amenokba metetdaksü. "India nung tenzüksü atema aruba Khristan missionary temji aika kibong mekümi alir tetsürtem liasü. Parnoki lenla ajaklen nungi shirangertem anepalua yari," ta pai ashi. Mathew-i, "Alima tesem ajaklen kanga tain rogotem nisung pongu nungi kabo shisatsü ramaa shiranger. India nunga tanur aser tainlonglong shilem 10 bo mental heath majung. Tawa coronavirus wara sülen tain shilem asem asemsü nungi kabo mental health majung," ta metetdaksü. Tanü putu nung tanurtem aser lanurtemi shisaliok dak sendakba nung timtem ajurur, kibong khuret, medemer tsütsülen nungi timtem aser

tejashi ajangshir; lanurtem tsüngda nunga ongdang tulu adoka lir, ibayongji youth pastor temia Gen Z lanurtem den sendaktepba tsütsü timtem ajangshiba lemsateper, ta pai ashi. Mental health wara dak sendakba nung Mathew-i, "Lanurtemi taneptsü aginer, anungji Arogotemi iba teyariji agütsüdar asü?" ta asüngdang. "Laishiba ajanga tanela takümüji senti ta ashiba ya science-ia agizüker. Anungji tamakok ngua alibaji asentenshir inyaksü atema maongka lir," ta pai ashi. Martin Luther, Charles Spurgeon, William Cowper aser E. Stanley Jones nunger ama Khristan lenirtemia tejashi ajangshia liasü, saka parnoki ajangshibatem ajanga ministry tashi itshia liasü, ta pai ashi. "Item lenirtem taküm otsü ajanga asenok dang, tejashi aser timtemji Khristan taküm ka nungi pilaa mali ta sayur. Tejashi aser timtem ajanga temeim mapa shisangtsü aser tenzüka wadang tashi itshitsü ta nenshia sayur," ta pai ashi. "Mental health sendokba Arogo kati züngsemtem nüngdak meperitsütetter. Arogotemi 'mental health audit' agütsüla aser teyari agütsütsüla," ta pai ashi. "Nai lokti dang 'diabetes' agi shiranger kwi lir, ta asüngdang nung aikati teka mekangtsü, saka mental health majunger kwi lir, ta asüngdang nungbo shingaia ola madoktsü. Ola madokbaji ajanga maaksü sayur. Asenoki iba tangatetbaji melenshitsütsüla," ta pai ashi. Mathew-isa, Yisu Khristai tangar aneptsütsü atema zübo memeimshi, anungji tangar tenzüksü atema asenoki asen zübo memeimshitsüla, ta ashi. "Kodang asenoki odiodia inyakdir asen züboji taaktsü mapa ka masü saka tangar aneptsüba hadir ka kümdaktsür. Asenoki asen Kibubai inyakba ama inyaksüla," ta paisa ayongzüük.

Arogotem dang tzümet süng lendong atema sarasademtsü ayongzüker

September 19, 2025: India nung talisa Uttarakhand aser Himachal Pradesh state na nung tzümet süng lendong nung nisung aika süogo aser nisung meyrjang aikati teyari nüngdaka aliba mapang nung Arogo lenirtemi tzümet süng lendong atema sarasademtsü aser lendong agi kongshir aliba timtemertem yaritsü ayongzüker. September 15-16 anogotem nung state ana nungji tzümet süng lendong nung nisung 18 süogo, nisung 16 sama aser meyrjang aika timtemdar.

Taküm June ita nung tzüngluruwa mongpu tenzüka sülen linük tesem balala nung tzümet süng, anentsüh aser tzünglu dak sendakba lendong balala nung nisung 1,100 jungnüa süogo. India nung state 15 nungbo tzümet süng lendong ajangshiogo. Nisung teimba asüba aser tamajungba kongshiba state ji Himachal Pradesh lir. Himachal nung nisung 400 shi asü, Kerala nung 335, Andhra Pradesh nung 258, Jammu & Kashmir nung 130, Bihar nung 98 aser Punjab nung nisung 55 süogo.

Khristan melungtet telok Caritas India-i state balala nung tzümet süng lendong agi kongshir alirtem nem chiyungtsü aser hygiene kits densema teyari balala agütsüdar. Timtemertem yaritsü atema Caritas India-i sen million 40 lemozüka liasü. Conference of Catholic Bishops of India Tir, Cardinal Filipe Neri Ferrao-i Khristantem aser Arogotem dang tzümet süng lendong atema sarasademjang aser timtemertem yaritsü atema tenla agüjang, ta mepishia metetdaksü.

ANOGO ABEN TSÜNGREM DEN

Tesülen tajungtiba
T.ken 132:1-10

Ne taküm nung tarongba tejangrabaji kechi? Ne kolok aser temulungjang sünga aliba pungmangji kechi? Dawid chuba pungmangji Kibuba külemdak ki ka yanglutsüba liasü. Iba ken nung Pai iba indang asenok dang ashir. Asenok rongnunga iba ama pungmang akar lidaktsünüali-teyanglur, teraksar masü.

Dawid taküm nung mapang talangba ka sepai ka liasü. Pai Israel nunger tsükchirtem nungi kümzüük aser linük nung yimjung bener aru. Saka Pai rara nungi yanglutsüba dangi meyip. Pai noklangnok mertsüng den melentepnü. Pai ashi, "Tsüngrem alitsü asoshi ki ka ni mangu tashi ni aonunga memejangtsü".

Saka Tsüngremi Dawid tejangraba tulu aser temeshi madalokdaksü. Solomom, Pa jabasoiang tekülemdakji yanglu. Tamasabo Dawid mepelai liasü saka Pai ashi, "Ibai Tsüngremi mulungba süra ni agizüktsü". Idangji kanga tesümgangtsü mapa inyak: Pai tesülen putu yaria tekülemdak yanglu. Dawidi Sentongji agütsü aser hon,taripi,senti long aser merang sen million aika jenjang yutsü.

Asenok sendong aser tejangrabatem ajakbo asenok mapang nung mataloktsü akok, saka asenoki tanabuba tajungtibaji inyaksü akok. Tsüngremi asenok alizüng matalokdaksüra, asenoki pa alizüng tongtettsü langa inyaksü akok, Pa alizüng tongtettsü asoshi asenoki kar yaridi. Asenoki agütsüdi. Asenoki asen shisatsü agütsüdir, asenoki ajungshidi. Asenoki ajak inyaksü makok, saka asenoki langkabo inyaksü akok.

Ne pungmang Tsüngremi mulungba nung matalokra, ne sempet aser rongsen ajanga kar pungmang atalokdaksütsü kari yariang. Kodang nai tangar nungsang anguba dang nungi Tsüngrem sentsüwangshi asoshi tali bilemdir Tsüngremi na Pa sentong ataloktsü asoshi lemanng timba nung amshitsü.

Tsüngremi anguba lemanng tajungtiba nung Tsüngremi na amshidakjang.

Rajasthan nung Khristan school aser hospital project nokdanger

September 19, 2025: sentongtem agir, aser Rajasthan state nung Hindu khenkhenbo mamangertem-a adener," ta metetdaksü. Udaipur diocese-i aser hospital ka amenoktsü sensakertem aser tribal atema project tenzüka anema nokdaker, ta osang ka ajanga metetdaksü. School aser hospital tasen amenoktsü merangbaji tribal nisungtem kangshia Khristan yimsü dangi meyipdaksütsü atema lir, ta Hindu telok jagi tai tongloksü. September 14 nü Dungarpur district kübok Jalana yimda Bajrang Dal züngsemtemi Arogo nung lenirtem ajurua liasü. Bajrang Dal züngsemtem jagi Arogo lenirtem dangji o tamajung aika ashi aser Arogo project tasenji tangsa anentsüla mesüra majungtsü ta amokmerenogo. Tesülen police arua loktiji senshidakja liasü. Jalana nung aliba Arogo nung putir, Siby Thomas-i, "Ni yangi tesüiba küm 15 tashi inyaka arur, ajisüaka tang mezüng onok nem tiyazü nung tai tongloksür. Arogo indang centre nung nung seminars, senden aser sarasadem

AO OSHI ANGAZÜKDAK: TANÜ ANGAZÜKTSÜBA OJANG



Tir Yimyim

Teyiprep

(adj) nisung ajak mejangsepba mapang, ayaterem.

* Teyiprep mapang auarterem senzür.

Teyira

(adj) temo agi temang ulua akümiba (obese, fat)

* Nisung teyira jajadang kanga timatemer.

OLONG PAITEP # 7276

1			2		3		4		5
6		7							
					8				
9				10					
						11			
			12						13
	14							15	
					16				
			17						
								18	
19									

TIPIEN

2. Teküm nung aliba ku

-

(8)

6. Y _ _ _ en

-

(3)

8. Tsük bendendak

-

(3)

9. Alia

-

(6)

11. Timba aküm

-

(4)

12. Temulung ila-a bilem

-

(5)

14. Alaka

-

(4)

16. Kecha taa mali

-

(6)

17. Ne den tambu

-

(3)

18. T _ _ _ ngtet

-

(3)

19. Kima nung sabang atemba

-

(8)

LANGTSÜNGLEN

1. Temejangdak

-

(6)

3. Angati nübu agi yari

-

(4)

4. Azüngtsü atema mejemba-

-

(6)

5. Memerük aküm

-

(5)

7. Tila masü

-

(4)

10. Tanemi

-

(4)

11. Temang nung sü enok

-

(4)

12. Tetsüngda nung

-

(6)

13. Reprangzük

-

(6)

14. Tai kümstü

-

(5)

15. Sentong

-

(4)

16. Jenti

-

(4)

OLONG PAITEP # 7275 TELANGZÜBA

TIPIEN:

2. Bangsemo, 6. Tiptem, 8. Jen,

9. Talila, 11. Aren, 12. Tzübo,

14. Alia, 16. Angati, 17. Odi,

18. Azü, 19. Sünglang.

LANGTSÜNGLEN:

1. Yipten, 3. Nüja, 4. Sangro, 5. Milen,

7. Tulu, 10. Laza, 11. Aben,

12. Tiyong, 13. Ajizük, 14. Aitsü,

15. Tasa, 16. Aina.

NAI-A YA METETTER MA



Adani Cement den parnok Group associate M/s PSP Infra ajanga "world's largest religious temple raft foundation casting" renemogo. Iba ya Ahmedabad anasa Umiya Dham nung yanglu aser ghonda 54 nung ECOMaxX M45 grade low-carbon concrete 24,100 cubic metres (M3) amshi. Iba ya Adani Cement ajanga yanglutetba proprietary sustainable mix lir. Anogo asem nung skilled workers aser technical experts 600 tema melentepa Ready-Mix Concrete (RMX) plants 26, transit mixers 285 aser high-performance cement 3,600 tonnes amshia Jagat Janani Maa Umiya (Parvati) temple indang foundation yanglu.

Minister Sanbor Shullai-i railway connectivity atema nenshir



Sanbor Shullai

Guwahati, September 19, 2025 (Agencies): Meghalaya nung tawa tasen shimba cabinet minister aser BJP lennir Sanbor Shullai-i Meghalaya nung aser talisa Byrnihat tashi railway connectivity alitsü nenshiogo.

Sendaktepa alirtem aser talisa railway line bener arutsü anema noktaktertemi khen meyipa reprangshitsü aser state-i goods trains arutsü melatsü ayongzüker ta Shullai-i ashi.

Mizoram, Manipur,

Nagaland, Tripura, Arunachal Pradesh, aser Meghalaya kübok Garo Hills amala tesemtem nung railway infrastructure agizükogo aser iba ajanga terenlok angur ta pai ashi.

"Mizoram aser Manipur nung railway lines lir. Garo Hills-ia tajangzüktem agir. Chief Minister Conrad Sangma lenisüba kübok sorkari NGOs den jembitsü aser parnok dang terenlok bener arutsüba indang rasaa ashitsüla. Asenoki Byrnihat tashi danga goods

trains arutsü melatsüla" ta Shullai-i ashi.

Meghalaya nung railway connectivity tajung aliba ajanga transportation costs ajemtsü, essential goods bener aruba zübarsü aser lisopurtem atema mapa adoktsü ta paisa shisem.

Inner Line Permit (ILP) aser bendangertem arutsü tsübuba atema Shullai-i "iba ya Centre sorkar dak keta lir" ta ashi.

"ILP ya asenok ket nung mali saka ni teti Delhi-i aodang iba onük jembir. Ni teti national leaders nenshir" ta Shullai-isa metetdaksü.

Shullai-isa Meghalaya nung alirtem dang BJP nem sorkar akümstü tashi agütsütsü mepishiogo.

"Kechiba BJP nem maongka magütsür? Onok ket nung MLA 31 dang lia sorkar kümdakjang. Onok nem küm pungu agüjang aser nenoki iba tajangzük angutsü" ta paisa ashi.

Pramod Boro-i election affidavit nung osang tai agütsü: Akhil Gogoi

Guwahati, September 19, 2025 (Agencies): Bodoland Territorial Region (BTR) Chief Executive aser United People's Party Liberal (UPPL) president Pramod Boro-i pa indang election affidavit nung ali rongsen mimbangogo ta Raijor Dal president Akhil Gogoi-i tai tongloksüogo.

Bodoland Territorial Council (BTC) elections nung Boro-i Goibari constituency nungi tokteper saka pai pa aser par kibong indang ali rongsen aika aliba mimbangogo ta Gogoi-i Guwahati nung osangbener dang ashi.

Gogoi-i official records jungjunga reprangdangba sülen

tai tongloksü ta metetdaksü.

"BTR tanishisangi rongsen mimshia elections nung tokteper. Iba ya tilateri onük ka masü saka Representation of the People Act, 1951 kübok özüng alema inyakba mapa ka lir" ta Gogoi-isa ashi.

Iba Act nung Section 33 nung candidate temi parnok, apuani aser tanurtem indang rongsen aser sentsühtem ajak ashitsü lateta lir ta paisa ashi.

"Candidate kari danga item osang mimbanga yura Section 125A kübok ken o benoka angadangsü akok. Iba ken o nung aibelenba putetra candidate ji ita trok tashi tepuokdak ayutsü aser pa/lai

election nung takok ngura magütsü akok" ta Gogoi-isa ashi.

"Boro aser par kibongi taoba küm ishika tsüngda ali talila alizükogo saka affidavit nungbo ibaji mali. Pa ama tashitait lennir kati documents tai agüja elections nung tokteptetra, ibaji democracy atema majung" ta paisa metetdaksü.

Raijor Dal tanishir Gogoi-isa iba onük ya Tamulpur district administration, State Election Commission, aser Chief Electoral Officer dangi zülüogo aser mapa kecha meinyakra Gauhati High Court dangi aotsü ta shiogo.

Post Malone-i December 8, 2025 nü Guwahati semdangsü

Guwahati, September 19, 2025 (Agencies): American rapper & singer-songwriter Post Malone-i India-i semdangsü aser December 8, 2025 nü Guwahati nung kenten sentong ka agitsü.

Post Malone-i Big Ass World Tour nung shilem ka ama Guwahati-i arutsü aser Khanapara Veterinary Ground nung shilem agitsü.

Malone-i 2022 nung Mumbai-i aruba sülen tang tanaben atema India semdangsü. Grammy-nominated artist Malone-i Rockstar (with 21 Savage), Congratulations, Circles, aser Sunflower from Spider-Man: Into the Spider-Verse kentem mejemba kanga nüngtugu kümogo.

Pa indang 2024 kensep F-1 Trillion ya global charts nung kanga bulua angaogo. Pai Taylor Swift, Morgan Wallen, Beyoncé, Justin Bieber, Travis Scott, Ozzy Osbourne, aser Dolly Parton nung den külemi shilem agiba ajanga tali nüngtugu aküm.



Post Malone

Assam sorkari tawa tenzükba Policy for Concert Tourism nung Guwahati concert ya shilem ka lir. Assam sorkari international live entertainment tesem tongti ka kümdaksütsü atema nükjidong lir.

"Assam-i world-class events ayongzüksü renema lir" ta Chief Minister Himanta Biswa Sarma-ia metetdaksüogo.

"Guwahati nung Post Malone kenten sentong ajanga Assam concert tourism policy nung tapak tasen ka lapoktsü. Tarutsü kümtem Guwahati, Jorhat, aser Dibrugarh yimitem ya tongtipang concert

destinations akümstü" ta CM Sarma-i ashi.

December 8 kenten sentong ya BookMyShow Live aser Live Nation-i Assam sorkar den külemi produce aser promote asür.

Malone indang world tour nung India dak alia Formula 1 Etihad Airways Abu Dhabi Grand Prix 2025 aser MDLBeast Soundstorm Festival, Riyadh nung shilem agitsü.

Guwahati concert atema September 20, 2025 anügdang 12:00 ako nungi ticket ayok tenzüksü.

Police ket nung automatic weapons mali: KP Sharma Oli



Kathmandu, Rongjui/Sept. 19 (Agencies): Taoba Nepal ato kilonser KP Sharma Oli-i Hokulbarnü linük indang Constitution Day nung sangdong ka agütsüba nung Nepal indang sovereignty amakba lemsatep aser charter wazüka ayutsü asoshi lungjemtsü ayongzük.

Gen-Z longkak aitba mapang automatic weapons amshiba indang pai asüngdang aser linük police ket nung item hadir mali ta ashi.

Facebook post ka nung Oli-i, "Tanü Constitution Day lir. Tanü constitution yanglua liasü, küm 70 timtema aruba sülen Nepal nüburtemi shimba ajanga constitution yanglu. Iba anogo democratic republic, federal inclusive system ka aser nüburtem temeden amenok," ta ashi.

Constitution yangluba mapang timtemba bilemteta, "Mokdangba aser linük sovereignty mechi timtem ajuruba ajangeta Constitution ya yanglu. Anungji Constitution of Nepal ya Nepal nüburtemi pei asoshi züluba lir."

Tawa Gen-Z longkak aitba indang jembidang, longkak aitba ya ozüing alema sapoka aitba mapa ka lir, ta Oli-i ashi.

"Taoba hopta Gen-Z longkak aitba ya yimjung nung alitsüba liasü, saka ozüing alema sapoka aitba liasü. Tasa tamajung yanglurtemi azüdokshi adokdaksütsü mechi sapoka ait, asen lanurtem tepset. Police ket nung maliba automatic weapons amshia nisung dak akhaba ya bushisüngdangtsüla."

"Sür aliba lanurtem den asükhu lemsateper aser yirur alirtem taneptsü angutsü atema

sarasademsür," ta pai ashi.

"Tang asen Constitution kanga sashia amakba mapang lir. Singha Durbar rongdokogo, Nepal indang map rongdokogo, linük maitsü samatsütsü meranger. Nüburtem asoshi inyakba lokti, court, business establishment aser political party tem offices, parnok lenir aser mapa inyaker indang ki, jurila rongsen teshimtet mitsü kumogo."

"Sovereignty amakba mapang aser asen constitution kumzuka ayutsü asoshi Nepal nung nübur ajunga lungjemtsüla," ta pai ayongzük.

"Asenok aliba ya sovereignty süra, constitution ya asen nujiso jong lir. Asenok lungjemba ajanga dang asen linük anema mepetmesü adokba nungi saktettsü aser asen linük kumzüksü."

"Asenoki constitution kumzuka yuti, sovereignty kumzuka yuti," ta Oli-i shia tembang.

Arishi küm 73 tain Sushila Karki ya Nepal indang interim prime minister shimer hopta ka lir Oli-i iba post ya lemsatepa liasü. Gen-Z longkak aitba mapang Oli'er sorkar laoba sülen la shim, aser iba longkak aitba mapang nisung 51 asü, ta Nepal Police-i ashir.

US, UK aser France-i BLA ya kiralongraryongrü-iyoktsümemulunger

United Nations, Rongjui/Sept. 19 (Agencies): Pakistan aser China nati Balochistan Liberation Army (BLA) aser par suicide wing Majeed Brigade ya UN 1267 sanctions regime küboki yoktsü mera agiba United States, United Kingdom aser France linük temi "technical hold" nung yutsü. Iba telok ya Al Qaeda aser ISIL den sendakteptsü atema kuli peria mali ta anüolen linük asem yagi asgir.

US-i iba telemtetba agiba nungya yimten yimsüsüba tsütsü osang tesashi ka ali ama ajiteter. Taoba ita ang Washington-i BLA aser Majeed Brigade ya par national list nung foreign terrorist organizations ama züingoka lir. Iba mapang Pahalgam amakba tai tonglokja aliba The Resistance Front ya Lashkar-e-Taiba den sendaktepa aliba telok ka ta US-i nüngja agütsüba ya kanga kumdanga mera agiba ama ajia liasü.

Washington-i iba nüngja agütsüba agi ajungmesoa Pakistan-i kanga kera China den teka amteper UN nung BLA aser Majeed Brigade tenüng benoktsü mera agi. Iba mera yagi Pakistan-i BLA ya India-i yarir ta mapang shia aitsüba taretba kumla. Pakistan-i agi.

Ajisüaka tang tesüsa US tangatetba ajanga Islamabad aser Beijing asoshi tezüdangtsü akum.

Pakistan nung amenoka aliba kiralongrar lenir anema Indo-US mera nokdangtsü asoshi China-i amshiba kasa "technical hold" ya tang US-ia amshir. Sajid Mir, Shahid Mehmood aser Talha Saeed densema Lashkar-e-Taiba lenir aika China mechi 1267 regime küboki maitdaksüi lir. Ano Abdul Rauf Asghar ya ka liasü, shiba Bahawalpur nung Operation Sindoor mapang tepset, saka India aser US lungjemer merangaka 2023 küm China-i nokdanga liasü.

Pakistan nung Baloch Liberation Army (BLA) ya talisa mepetmesü agi sünger aliba Balochistan province nung separatist group tejangjatiba ka kumogo. Parnoki security forces, ki o jen aser bendangeri jangraba nung tenük yoker amaker aser linük balalai parnok dak tenük yoka linük karibo parnok ya kiralongrar telok ka ta sangdonga lir.

BLA yagi Baloch nüburtem asoshi nüchiso meshir. Iba movement ya 1940s nung tenzük aser iba sülen Balochistan ya 1948 küm

Sudanese paramilitary teloki mosque nung nisung 43 tepset

Cairo, Rongjui/Sept. 19 (Agencies): Sudanese paramilitary group kati North Darfur yimtiba El Fasher nung Hokulbarnep mosque ka telung nung sarasadema aliba mapang civilian 43 tepset, ta yangji aliba medical telok kati ashi.

Rapid Support Forces ajanga drone ka amshia amakba mapang nisung tain aser tanurtem densema Muslim nung tamangertem tepset, aser ibai nok-nü bena maliba civilian anema mapa tamajung inyakba lir, koba ajanga iba teloki nisung meimchir, tamangba yimsü aser international law mezüngshiba sayur, ta The Sudan Doctors Network ajanga Hokulbarnü X nung ashi.

The Resistance Committees

in El Fasher ta sür human rights activists dena aliba telok kati Hokulbarnü video ka lemsatepba nung mosque ya shilem tuluka aoyi kumer tesem balala nung nisung tasü mang kar liasü.

Mosque aliba tesem tejangja melemsatep, saka tang tesüsa drone amshia amakba ya El Fasher nung RSF aser army tsüngta hopta tepiyong rara arudang tesem balala amakba nung tesüsaba alitsü.

Army aser RSF tsüngta rara ya April 2023 nung tenzuka civil war akum aser nisung 40,000 shi tepsetogo, ta World Health Organization ajanga ashir aser ano nisung 12 million shi tesem balala nung jenoka aika ayawara tia nung lir. Telok ana tsüngta küm ka dak tema rara aruba

nung El Fasher ya tiyongtsü lira ser Darfur region nung mitkartem tashi ita aliba tesem tatembangba lir.

Brehostibarnüa yimti anüolen aser south tsütsü kanga sashia rara liasü, kong ola tulu adoka apokba aser drone amshia amakba liasü, ta Darfur Victims Support Organization dang ashi.

The Resistance Committee in El Fasher ajanga Brehostibarnü sangdong ka nung ashiba agi, RSF-i yimti nung aliba displacement shelters nung tetsür aser taintem densema nok-nü bena maliba civilian tem dak tenük yoker amak.

Bodhbarnüa RSF yagi nisung aliba kiyong nung tanen makai artillery tulu amshia amak ta iba telok yagisa ashi.

MENUNGRA BILEMTETER



Onoki teti meima aliba asür **IMLINUNG TANG** (Chuchuyimlang), na iba akümlir wadang tempanger tanü 20th Sept 2025 anogo küm ana abensa arudang, onoki nü temeim aser aria bilemba tali bilemtetshia menungrar.

Na onok den meliaka, ozü mulungjang aser sarasadem nung na teti lir.

~ Temeim Kinungtsü, Chimir,
Semchirtem aser Kinungertem.



Guangzhou, Sept. 19 : China south tsütsü Guangdong Province kübok Shanwei City nung süngdong ka laoa aliba ketdangtsür temi September 19, 2025 nü indokba noksa nung angur. Typhoon Mitag, taküm typhoon 17 buba, China south tsütsü Guangdong Province tonga Hokulbar nikongdang 2:50 ako meta aru. Iba yipru nung mopung ya second ka nung meters 25 tashi kera aoner.



NATIONAL EDUCATION SOCIETY FOR TRIBAL STUDENTS (NESTS)

An autonomous organization under Ministry of Tribal Affairs, Govt. of India
Gate No. 5, Jeevan Tara Building, Parliament Street, New Delhi-110001

RECRUITMENT NOTIFICATION

EKLAVYA MODEL RESIDENTIAL SCHOOL STAFF SELECTION EXAMINATION (ESSE) – 2025

Ministry of Tribal Affairs, Government of India kübok temeja tentet, National Education Society for Tribal Students (NESTS) ajanga linük tesem balala nung aliba Eklavya Model Residential Schools (EMRSs) atema teaching aser non-teaching staff asoshi online application meshir.

Vacancies tejangja yamai alitsü:

Principal (225), PGTs (1460), TGTs (3962), Female Staff Nurse (550), Hostel Warden (Tetsür/Tebur) (635), Accountant (61), JSA (228), Lab Attendant (146)

ESSE-2025 atema online application, educational qualifications aser danga eligibility criteria indang osang tejangja Information Bulletin nung angutsü, koba www.nests.tribal.gov.in nung reprangtetsü. Jangra aliba aser temsüa aliba candidates temi online ajanga 23/10/2025 (aonung 11:50 ako tashi) tashi apply sütettsü.

Candidate tem dang tarutsü nung updates atema www.nests.tribal.gov.in nung reprangtsü ajungshir.

Issued by NESTS

25th NSF MM Trophy: Phesama SU, Chedema Village YO nungeri takok angu

Kohima, Rongjui/Sept. 19 (TYO): Indira Gandhi Stadium, Kohima nung 25 buba NSF Martyrs' Memorial Trophy 2025 tenzüker troknü buba (Hokulbarnü) asayatem nung Phesama Students' Union aser Chedema Village YO ajanga pei tata asaya nung takok ngua liasü.

Hokulbarnü mezüing asaya nung Phesama Students' Union-i Corinthians FC madak 3-2 agi takok angu. Iba asaya nung Theja Chuse aser Neisaletto Kipu nagi Phesama Students' Union asoshi goal ka-ka agüja liasü.

Ano asaya tenzüker minute

46 buba nung Corinthians FC nungi par sasa goal ka agütsü. Corinthians FC asoshi Thejaneilhou Mere aser Thejangutuo Pfiisenuo nati goal ka-ka agütsü.

Neizokhotuo Belho, secretary, Steering Committee, 25th NSF Martyrs' Memorial Trophy ajanga 'Player of the Match' sempet ya Phesama Students' Union nungi Theja Chuse nem agütsü.

Tanabuba asaya nung Chedema Village Youth Organization ajanga 2-0 agi Kidima Farmers United madak takok ngua liasü.

Chedema Village Youth

Organization asoshi goal anaprong ya Lunminlal-i minute 82 buba aser 85 buba nung agüja liasü.

Iba asaya nung Chedema Village YO nungi Manglienboi Neihsial ya 'Player of the Match' sangdonga iba sempet ya Asano Zashu, Member, Anchor Committee, 25th NSF Martyrs' Memorial Trophy ajanga agütsü.

September 20, 2025 asoshi asaya:

- Mez & Co Vs Kigwema Students' Union @ 1 Noon
- Sadar Hills FA (Manipur) Vs Nagaland University Kohima Campus.

India nunger Satwik-Chirag na China Masters semi-final tongogo

Beijing, Rongjui/Sept. 19 (Agencies): India nunger tarep badminton asayar Satwiksairaj Rankireddy aser Chirag Shetty na China Masters 2025 semi-finals tongogo. Seed ti buba nung alir Satwik-Chirag nati quarter-final nung China nunger Ren Xiang Yu aser Xie Haonan den kanga junga asayateta liasü.

Satwik-Chirag nati China nunger Ren aser Xie madak 21-14, 21-14 agi minute 37 nung takok ngua liasü. Semi-final tanabuba nung Satwik-Chirag nati quarter-final pezü buba nung takok angur den asayatsü.

Iba asayamung quarter-final pezü buba nung Leo Rolly

Carnando, Bagas Maulana aser Aaron Chia, Soh Wooi Yik nunger asayatsü. China Masters 2025 semi-final ya Satwik-Chirag asoshi 2025 küm semi-final tenet buba alitsü.

Iba asayamung mezüing semi-final ya South Korea nunger Kim Won Ho aser Seo Seung Jae nati Fajar Alfian aser Muhammad Shohibul Fikir den asayatsü. South Korea nunger ana ya top-seeded lir.

Satwik-Chirag na Hong Kong Open final nung tamakok ajurua liasü.

China Open quarterfinal Hokulbarnü asayadang India tsür badminton asayar PV

Sindhu ya South Korea tsür top-seeded An Se Young-i tsükdaktsüogo.

Korean tsürlai Sindhu madak 21-14, 21-13 agi takok ngua iba asayamung semifinal tongogo.

India nunger tebur kija asayar Lakshya Sen ya Toma Junior Popov-i 21-11, 21-10 agi minute 30 nung tsükdaktsü aser aji masüdang Ayush Shetty ya mezüing asaya nung tsüka India nunger tebur kija asayar kata iba asayamung nung mali kumogo.

Tarep temeyoktep asayar Dhruv Kapila aser Tanisha Crasto na China nunger Feng Yan Zhe aser Huang Dong Ping nati 21-19, 21-13 agi tsükdakja liasü.

STATE OSANG : Tapak 1 nungi...

Nagaland Survey nung income meputepba...

Iba report ajanga Nagaland nung unemployment aser skill gaps atema policy balala yangluba nung tongtipang shilem agütsü ta paisa shisem.

"District ajak merenlok tashin Viksit Nagaland metongtettsü. Department-i 2024 nung Nagaland Sample Survey Unit amenokba atema tenüngsang agütsür, iba ya kanga dang tongtipang aser mapang shitak ka nung inyakogo" ta Advisor Sethrongkyu Sangtam-i ashi.

Advisor Yhome-i RMSA-2016 tesayurtem dang...

Tanüngbatemji non-petitioners ta züngoka lir aser ita shia Rs 25,000 angur, saka okadak ken o benoka alirtemi Rs 31,315 angur" ta Advisor Yhome-i ashi.

"Parnoki Nagaland sorkar kübok full employment meshir. Centre sorkar nungi senotsü ajema aruaka state sorkari itasen shitak agütsütsü meranger. State budget nung education nung 9% endoker aser ibaji itasen nung endoker" ta paisa ashi.

Lungkak aitba tesayurtemi bonds nung tashiyim agi sign südaktsü ta ashibaji tiyazü kechiyong parnok nen jelia agütsür ang sign südaktsü ta paisa shisem.

"RMSA-2016 tesayur kari mapa nungi anenogo aser

Paisa District Domestic Product (2023) aser District Consumer Price Index (2025) adokba indang nenshi aser item ajanga policy formulation len anir ta shisem. March 31, 2025 tashi nung Nagaland Statistical Handbook 2024 nung applicants 71,034 employment exchanges live register nung lir ta Advisor-isa metetdaktüsü.

Secretary Economics & Statistics, Akunu S Meyase, IAS-ia o jembidang department nung staff-i kanga meranga

tanüngba school tem nung maneni inyakdar. Tesayurtem tasentem open competitive examinations ajanga dang shimoker" ta Advisor Yhome-isa metetdaktüsü.

"Naga Students' Federation (NSF)-i sorkar aser tesayurtem tsüingda tiyongtsü nung inyaktsü aruba pelashishia agizüker, ajisüaka iba ken o ya ozüngi melaba ama inyaka odaktsüsüla. Parnok Advisor ka ama ni parnok asoshi tajungtiba agütsünür saka parnoki sorkar inyaksangshi angatettsüla. Telemtetba ka agütsü saka ibaji magidang asenoki kaketshirtem senzüka meyutsüli" ta pai ayongzüük.

Supreme Court oshidang agütsüba sülen department-i anogo 84 sülen ang review

inyakba aser bendanga agütsüba ajanga survey renemba atema tenüngsang agütsü.

Iba report ya asoshi kanga senti lir aser policy yanglurtem atema mapang shitak ka nung sayaogo. Parnoki lemtetbatem ajanga Nagaland nung alirtem asoshi terenlok bentsür arutsü ta lai ashi.

Iba sentong nung mendenji Additional Director Neisatuo Puro liasü aser Additional Director Charles N. Kikon-i anküp tepela o jembi.

petition benokba ya Finance aser Personnel & Administrative Reforms dena tanga department tem den asüngdangtepba agi lir ta Principal Director Shashank Singh-i ashi.

Tanü Advisor Yhome den tongti ketdangsürtemi lungkak aitba tesayurtem den ajurutep aser parnok dang luden nung adentsü aser lungkak aitba anentsü mepishia liasü.

Ajisüaka, RMSA-2016 batch spokesperson Renbemo L. Patton-i osangbener dang ashiba agi department-i inyaka otettsüsa lemtet ka magi tashi kecha magizüktüsü.

"Onoki hopta ana lungkak aitogo aser Hombar nungi lungkak aitba sentong tuluba agütsü" ta Patton-isa ashi.

STATE OSANG : Tapak 2 nungi... Dimapur nung teintet rogotem...

"19 century nungbo nisung arishi ya küm 40 nungi 50 tsüingda dang liasü aser iba sülen 20th century nung nisung arishi 60 nungi 70 tashi kuma adok aser tang asenok 21st century nung alirtem arishibo 80 nungi 90 tashibo tashi itita alir. Aji oda, küm 74 sülen taruba 22nd century ajungdangbo nisunger arishi ya küm 100 nungi 150 tashibo litettsü aser oda-odabo nisunger arishi ya akhi putu ama noklang asem pezü tashia alitsü ta nisunger arishi indang shisadangertemi ashir," ta paisa lemsatep.

"Asenok shi aser tanela nung küm kümshitsü asoshi asenok temang arakzüktüsü nüngdaker, anungji, asenok temang arakzüka shi aser tanela nung küm kümshiba ajanga Tsüingremi mulungba mapatem nung shilem agia, alima aser nübortem nem tajangzüük agütsütsü asoshi asenok rongnung Group balala lemsar, kari tanela anir aruba nung Mission mapa inyaka küm shia Mission Trip aotsü, kari Music, kari sports, kari farming, kari Art & Literature mapa nung ta pei pei jangraba mapa nung telok tenteta Pensioners telungjem kübok inyaktsü aser kokra pensioner-temi züsentetbatem ayoktsü asoshi Pensioners daily market lapoka inyaktsüa akok aser ano

Kohima ama Pensioners-tem den longjemer lanurtem asoshi taküm yangludak 'Skill aser Reformation Center' lapoka asen lima nung temelenshi tulu bener arutsütsü tanü teintet rogotem dak tashi lir," ta Tir Yimyim yimozülurisa ayongzüük.

"Asenok ya asenok agütsü kisüing inyakba nungi masü saka tangar asoshi tajung inyakba nungiang tepela aser tesünep angur, aser tepela o tesünep naji asenok shi aser tanela küm kümshitsü asoshi mozü tajungtiba ana lir," ta paisa ashi.

Iba kasa sentong nung Tebi tedi Wb. L. Sosang Jamiri tayongzüükba o jembidang, " asenok tanü teintet rogotem akhi tsüraburtemi inyakba madoksa aser lanurtemi imlaba ama malir, anungji asenok asentenshia lokti aser arogo asoshi mapa tajung inyaktsü merangdi," ta ayongzüük.

Iba sentong nung Lengrijan nung alir Ao Pensioner-temi ken tajung ka aten aser melepzüing o DDAPT nung tir Wb.Imti Longkumeri metetdaktüsü. Iba sentong nung menden Wt.Akümla Imchen liasü aser DDAPT nung kimen Wb. N. Lanu Aier-i sarasadema sentong tenzüük aser lokti külemi sarasadema sentong tembang.

Kijumetoumayimtsüing nung MCH...

Immunized sür aliba tanurtem, ASHA aser mashisa aliba tetsürtem nem sempet & nutritional package tem agüja liasü. Iba Maternal & Child Health (MCH) camp nung ajak senteper nisung 62-i shilem agia liasü.

Ajak senteper ANC - 13, IUCD insertion - 5, NCD Screening - 43, Pediatrician - 17, Immunization - 11, Anemia screening (RBSK) - 20 aser Laboratory test - 43 agi. Camp nungsa IEC pamphlets, leaflets anagti lemja liasü.

Dy.CMO Kohima, Dr. Imchatoshi-i aniba team nung DVBO/DSO Dr. Kevilhulie Meyase, DPO (RMaNCAH+N) Dr. Khrievilhou Nakhro, Dr. Ayo Thao (Obs & Gynae) Viswema CHC & Dr. Akatoli, Pediatrician, Chiephobozou CHC, DPMU's, BPMU Jakhama block, CHO I/C den Kijumetouma HWC-SC, CHO I/C den Sakhabama HWC-SC aser CHO I/C den Dihoma HWC-SC nunger densema liasü.

Miss Kohima 2025 tetoktepba...

October 6-10 anogotem Grooming Period (Pewe Tunyi Khamo aser mentors temi lenmang sayua) alitsü aser October 14 nikongdang 1:00 ako nung Main Show ya RCEMPA nung ayongzüka Miss Kohima 2025 shimtsü.

Hokulbarnü sentong nung Kevilenuo Roselyn Miachio menden liasü, Tolika K. Kshepu ajanga sarasadem aser Neitho Khamo-i pela agizükba o jembia liasü.

Iba sülen special

performances, tetokteper tem pei sasa metetpelaba aser Pelevinuo Rupreo-i anir sashing ceremony agia liasü.

Social Media ajanga Personal Branding indang session ka Pewe Tunyi Khamo-i agi aser iba sülen Talent Round agiba nung contestant temi subtitle miss talent atema toktepa liasü, kong tetendanger tem Kevizenuo Dozo, Sentiein Kichu aser Neitho Khamo nungertem liasü.

BILEMDANGANG

"Ashikülaka takok anguba dang nungi ochishia tamakok angu tajungba."